

Pronte a partî la gnove stagjone di “Maman!”

la transmission par furlan che ARLeF e dediche ai fruts,
in onde su Telefriuli dai 13 di Otubar

Al è dut pront pe otave stagjon di Maman!, la transmission televisive in lenghe furlane, risultât di une coproduzion de ARLeF - Agenzie regjonâl pe lenghe furlane e di Telefriuli.

Daria Miani, adun cul so cjâr gjatut Vigji, a son pronte par tornâ a intratignî i fruts dai 4 ai 8 agns di etât, che propit par lôr al è pensât il program. La transmission e larà in onde sui 13 di Otubar che al ven fin al mê di Jugn, ducj i vinars aes 18.30 e in repliche di domenies aes 7 e aes 13.

La formule di Maman! e je, za de sô prime stagjon, un miscliç di intratigniment educatîf, spazis dedicâts al zûc, moments di diversion cui cartons animâts, leturis e musiche. La gnove serie si presente, come simpri, siore di rubrichis divertentis e stimolantis, come "**La cuisine Bete**", la cuisine strambe e colorade di Daria Miani (alias la stesse Daria), che ur spiegarà ai fruts cemût realizâ tancj lavoruts simpatics midiant di laboratoris o dant sugjeriments par risolvî piçulis situazions de vite di ogni dì. Stant il sucès de stagjon passade, e torne la rubriche "**Zuìn cu lis lenghis**" che e à tant che protagoniscj i piçui Max e Leo: i doi fradis, che a fevelin in maniere fluente inglês, furlan e talian, si confrontaran cun Daria Miani zuiant e insegnant ai plui piçui tantis peraulis dal inglês cu la lôr corispondence tal furlan.

No pues mancjà l'apontament cu "**La pueste di Maman!**", là che la condutore e je impegnade tal rispuindi aes domandis mandadis dai piçui telespetatôrs; "**Lein insiemi**" al è il moment dedicât ae leture di flabis e contis; "**Fasìn un zûc**" al cjape dentri i fruts cun zûcs e quiz.

In ogni pontade, po dopo, no mancjaran il moment dedicât ai cartons animâts - in particolâr te seconde part de stagjon al sarà presentât un gnûf, che al fasarà divertî i plui piçui cu... la matematiche – e chel dedicât ai videofumets cun protagonist il piçul **riç Ghiti** e i siei tancj amîs besteutis. Par balâ e cjantâ insiemi par furlan, a saran invezit proponudis gnovis videocjançons in *Sacheburache* (un progjet Belka Media) come ancje chês di *Vosutis te sachete* (un progjet de Associazion musicâl “Bertrando di Aquileia”).

Dutis lis gnovis pontadis di Maman! a saran po dopo a disposizion su la *tv on demand* di Telefriuli come ancje sul canâl YouTube e sul sît de ARLeF. Achì a son za presintis lis 194 pontadis des stagjons passadis e sul sît i fruts a cjataran ancje altris contignûts simpatics leâts simpri a Maman!.

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / e-mail: arlef@caltpr.it

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<

Midiant dal divertiment, de narazion e dal zûc, la finalitât di Maman! e je chê di esponi i fruts al plurilinguissim e ai tancj vantaçs cognitîfs che a vegnin dal doprâ plui lenghis za di picinins insù.

Udin, ai 9 di Otubar dal 2023

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / **e-mail: arlef@caltpr.it**

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<